

- राज्य री सात विधानसभा सीटां माथे उपचुनाव सारू 69 उम्मीदवार मैदान मांय—13 नवम्बर ने वोट पड़ेला।
- पांच दिन रा दीवाळी रा त्यौहार री कड़ी मांय आज छोटी दीवाळी मनाई जा रही है—राज्य मांय सैर—सपाटा री ठौड़ां मोटी तादाद मांय सैलाणी दीवाळी मनावण सारू पूग रहया है।
- राज्य सरकार एक नवम्बर ने छुट्टी रो ऐलाण कीनो— सरकारी कर्मचारियां रा मकान किराया भत्ता मांय बढ़ोतरी।
- लौह पुरुष सरदार वल्लभ भाई पटेल री जयंती रा सिलसिला मांय प्रदेश मांय आज ई राष्ट्रीय एकता कार्यक्रम राख्यी ज्या।

000

राज्य रा 7 विधानसभा हलकां मांय 13 नवंबर ने क्वेण वाला उप—चुणाव मांय 69 उम्मीदवार चुणाव मैदान मांय है। सब ऊं बत्ता 12—12 उम्मीदवार दौसा अर खींवसर विधानसभा हलकां मांय है। ई रे अलावा झुंझुनू मांय 11, रामगढ़ अर चौरासी मांय 10—10, देवली—उनियारां मांय 8 अर सलूबंर मांय 6 उम्मीदवार चुणाव मैदान मांय है। आं मांय दस महिला उम्मीदवार है। सब ऊं बत्ती 3 महिला उम्मीदवार सलूबंर विधानसभा हलका मांय है। ई सागे गई अनुसूचित जाति वर्ग रा सात अर अनुसूचित जनजाति वर्ग रा 23 उम्मीदवार चुणाव लड़ रहया है। उप चुणाव सारू भरी ज्या 118 पर्चा मांय ऊं 91 मंजूर करी ज्या, 11 नामपाना खारिज कर दिया ज्या जद के 16 उम्मीदवार नाम पाछा ले लीना। आज नाम पाछा लेवण री आखिरी तारीख ही। दौसा मांय 5, देवली—उनियारा अर झुंझुनू मांय 3—3, चौरासी अर खींवसर मांय 2—2 अर रामगढ़ मांय 1 उम्मीदवार नाम पाछो ले लीनो। सात ई विधानसभा हलकां मांय उप चुणाव रे दौरान स्वतंत्र, निष्पक्ष अर बिना डर्या वोट देवणो तैय करण सारू 1 हजार 938 मतदान केन्द्रां मांय ऊं 1 हजार 122 केन्द्रां माथे वोट देवण री प्रक्रिया री लाइव वेबकार्स्टिंग करी जावेला। आं हलकां मांय 735 मतदान केन्द्रां री संवेदनशील मतदान केन्द्र रा तौर ऊं पिछाण करी ज्यी है। ई बीच निर्वाचन विभाग उड़न दस्तां अर दूजी निगरानी टीमां सागे आबकारी अर परिवहन विभाग समेत न्यारी—न्यारी एजेंसियां ने गैर—कानूनी नकदी, शराब अर दूजा मुफ्त सामान बांटण ऊं रोकण सारू कार्यवाही तेज करण रा हुकम दीना है। ई बीचे पुलिस प्रशासन ई उप—चुणाव ऊं जुड़ी तैयारियां मांय लाग्योड़ो है। ढूंगरपुर ज़िला रा चौरासी विधानसभा हलका मांय उप—चुणाव ने ध्यान राखता थकां पुलिस अर सीआरपीएफ रा जवान आज चौरासी विधानसभा हलका रा न्यारा—न्यारा गांवां मांय फलेग मार्च निकाळ्यो। ई दौरान जनता ऊं बिना डर्यां, शांति सागे वोट देवण री अपील कीनी। दूजी कानी उपचुनाव वाला हलकां मांय वोट देवण रो प्रतिशत बधावण सारू जाग जगावण बाबत् न्यारा—न्यारा कार्यक्रम राख्या जा रहया है। टोंक मांय आज महिलावां री ओर ऊं जागरुकता रैली अर कलश यात्रा रे मार्फत वोट जरूर देवण रो संदेश दियो ज्यो।

000

पांच दिन रा त्यौहार दीवाळी रा तहत आज छोटी दीवाळी मनायी जा रही है। इण ने रूप चौदस अर नरक चौदस रा तौर ऊं जाणी जावे है। आज न्यारी—न्यारी ठौड़ां जातरू तळावां मांय पवित्र स्नान कर र धन, धान्य अर सुख—समृद्धि री कामना कीनी। आज रूप चौदस रे मौके पाली मांय महिलावां हाथां माथे मेहंदी लगवायी। दीवाळी रे मौके मिदरां, बाजारां अर कारोबारी प्रतिष्ठानां मांय रंग—बिरंगा सजावटी सामान, दीयां अर एलईडी लाइटां री जगमगाहट घणी सोहवणी निजर आ रही है। केई ठौड़ां परम्परागत रंगोली अर मांडणा ई माण्डी ज्या है। और जाणकारी म्हाणा खबरनवीस ऊं—'

दीवाळी रा त्यौहार रे मौके बाजारां मांय रंग—बिरंगी झालरां अर लाइटां सागे न्यारी—न्यारी थीम माथे सजावट करी ज्यी है। दीवाळी रा त्यौहार ने ध्यान राखता थकां जयपुर शहर मांय आज ऊं 2 नवम्बर ताँई आवण—जावण री व्यवस्था मांय बदलाव करी ज्यो है। पाली मांय देवस्थान विभाग रा सोमनाथ महादेव मिंदर मांय खास सजावट सागे आरती, अन्नकूट उत्सव अर खास कार्यक्रम राख्या जा रह्या है। देवस्थान विभाग मिंदर मांय सोहवणी रोशनी ऊं सजावट करण अर अन्नकूट उत्सव रीत रे मुजब मनावण रा हुकम दीना है। जैसलमेर मांय लोकदेवता बाबा रामदेव रा मिंदर मांय भांत—भांत रा फूलां ऊं सजावट करी ज्यी है। सीमा सुरक्षा बल—बीएसएफ री ओर ऊं सरहद रा पहरेदारां अर वां रा पिरवार वाळां सारू दीवाळी मेलो लगायो जा रह्यो है। भरतपुर मांय आज दीपावली महोत्सव रा तहत जिला प्रशासन री ओर ऊं सुजान गंगा नहर माथे दीपदान रो कार्यक्रम राख्यी ज्यो। सिरोही जिला रा माउंट आबू मांय पड़ौसी राज्य गुजरात सागे ही देश रा न्यारा—न्यारा हलकां ऊं सैलाणी दीवाळी मणावण सारू आ रह्या है। पेश है म्हाणा खबरनवीस री रपट—

लोक सभा अध्यक्ष ओम बिरला, राज्यपाल हरिभाऊ बागडे अर मुख्यमंत्री भजनलाल शर्मा जनता ने दीवाळी अर आवता पर्व—त्यौहारां री शुभकामनावां दीनी है। राज्यपाल दीवाळी, गोवर्धन पूजा अर भैया दूज रा सिलसिला मांय शुभकामना संदेश देता थकां कहयो के ओ त्यौहार अन्धारा माथे रोशनी री जीत री निशाणी है। मुख्यमंत्री वां रा संदेश मांय कहयो के दीयां रो ओ त्यौहार अन्याय अर शोषण रे खिलाफ न्याय अर संघर्ष री जीत रो उत्सव है।

मुख्यमंत्री जनता ऊं भगवान श्रीराम रा आदर्शा ने जिन्दगी मांय उतार र बेसहारा लोगां री मदद करण रो संकल्प लेवण री अपीली कीनी। न्यारा—न्यारा ज़िलां रा कलेक्टर ई जनता ने दीवाळी री शुभकामनावां देता थकां त्यौहारां रे मौके भाईचारो बणायो राखण री अपील कीनी है। हनुमानगढ रा जिला कलेक्टर कानाराम ई मौके लोगां ऊं नशो नी करण री अपील करता थकां मुख्यमंत्री आरोग्य योजना मांय नाम मण्डावण री अपील कीनी।

चूरू रा ज़िला कलेक्टर अभिषेक सुराणा जनता ऊं गारा रा दीया अर स्थानीय कारीगरां कानी ऊं बणायी ज्या सामान री खरीदी री अपील कीनी।

दीवाली विद माय भारत री पहली वर्षगांठ रे मौके ई प्रदेश मांय न्यारा—न्यारा कार्यक्रम राख्या जा रह्या है। सवाईमाधोपुर मांय नेहरू युवा केंद्र अर कन्फेडरेशन ऑफ़ ऑल इंडिया ट्रेडर्स री ओर ऊं महावीर पार्क, अंबेडकर सर्किल अर सब्जी मंडी चौराहा रे आरे—सारे नौजवान श्रमदान कीनी। ई मौके साफ़—सफाई रा बारा मांय जाग जगायी ज्यी अर लोगां ने शपथ दिरायी ज्यी। पुलिस महानिदेशक उत्कल रंजन साहू दीवाळी रे मौके पुलिस री ओर ऊं जनता री जिन्दगी मांय खुशहाली अर समृद्धि री मंगलकामना कीनी है। डी.जी.पी. वां रा संदेश मांय कहयो के राजस्थान पुलिस प्रदेश मांय शांति अर कानून—व्यवस्था बणायी राखण, अपराधां माथे काबू करण अर जनता री हिफाजत सारू सगळा जरूरी जतन कर रही है। सवाईमाधोपुर री एस.पी. ममता गुप्ता ई जनता ने दीवाळी री शुभकामनावां देता थकां सांप्रदायिक सौहार्द बणायो राखण अर प्रदूषणमुक्त ग्रीन आतिशबाजी करण री अपील कीनी है।

000

त्यौहारां रे मौके मुसाफिरां री बत्ती तादाद ने ध्यान राखता उत्तर पश्चिम रेलवे री ओर ऊं 48 खास गाड़िया चलायी जा रही है। ई सागे ई न्यारी—न्यारी रेलगाड़ियां मांय कुछ बगत सारू 148 डिब्बा और जोड़ी ज्या है। उत्तर—पश्चिम रेलवे रा मुख्य जनसंपर्क अधिकारी कैप्टन शशि किरण आ जाणकारी दीनी। वे बतायो के दीवाळी अर छठ पूजा समेत न्यारा—न्यारा त्यौहारां रे मौके मुसाफिरां री बत्ती तादाद ने ध्यान रखता थकां व्यवस्थावां चाक—चौबंद राखण बाबत् खास अभियान चलायो जा रह्यो है।

ई रा तैत चालती गाड़ी मांय चढ़बा री कोशिश करण वाळां ने रोकण सारू प्लेटफॉर्म माथे रेलवे सुरक्षा बल रा और जवान तैनात करी ज्या है।

000

राज्य सरकार दीवाळी रे मौके 1 नवंबर ने छुट्टी रो ऐलाण कर दीनो है। सामान्य प्रशासन विभाग रा शासन सचिव जोगाराम ई बाबत् हुकम जारी कर दीना है। राज्य सरकार सरकारी कर्मचारियां रा आवास भत्ता—एचआरए मांय बधोतरी रो ई फैसलो कीनो है। मानी महकमा री ओर ऊं जारी हुकम रे मुजब वाय श्रेणी रा शहरां रा कर्मचारियां ने 20 जद के जेड श्रेणी रा शहरां रा कर्मचारियां ने 10 फीसदी आवास भत्तो मिलेला।

000

काल लौह पुरुष सरदार वल्लभ भाई पटेल री जयंती मणायी जावेला। ओ दिन राष्ट्रीय एकता दिवस रा तौर ऊं ई मणायो जावेला। ई मौके मुख्यमंत्री भजनलाल शर्मा वां रा संदेश मांय कहयो के सरदार पटेल देश ने एक राखण मांय खास काम कीनो। वे कहयो के आज रो मोटो, एक अर सुनहरो भारत सरदार पटेल री कूटनीति अर दूर री सोच रो नतीजो है। मुख्यमंत्री जनता ऊं देश री एकता अर अखण्डता बणायी राखण सारु भाईचारा री भावना मज़बूत करण बाबत् कहयो। सरदार पटेल री जयंती रा सिलसिला मांय देश मांय सतर्कता जागरुकता सप्ताह मनायो जा रहयो है। आज बीकानेर मांय पंजाब नेशनल बैंक री ओर ऊं वॉकेथॉन राख्यी ज्यी। केन्द्रीय विधि अर कानून मंत्री अर्जुनराम मेघवाल हरी झंडी बता र वृद्धजन भ्रमण पथ रे आगे ऊं वॉकेथॉन ने रवाना कीनी। ई मौके मेघवाल कहयो के देश री बरकत मांय हर एक रेहवासी रो खास काम है। राष्ट्रीय एकता दिवस रा सिलसिला मांय आज प्रदेश रा केई जिलां मांय कार्यक्रम राख्यी ज्या। नीम का थाना मांय जिला कलेक्टर अहलकारां अर कर्मचारियां ने शपथ दिरायी।

000